

## Canbi

---

Un Anbi ta un institushon ku ke alkansá un meta na bienestar general. Anbi ta un konsepto hulandes. Nos no konosé esaki den Karibe Hulandes. Esaki ta un lástima. Na Hulanda un Anbi ta disfrutá di bentaha- i eksonerashonnan fiskal hopi agradabel.

Mayoria biaha un Anbi ta un fundashon. Esei ta núkleo di e idea. Hopi tempu pasá intenshon di un fundashon tabata pa apartá sèn pa un bon kousa. Esaki por tabata un instituto pa ansiano, un hospital òf un instituto di siegunan. Pa motibu di e bon kousa i e ousensia di un afan di lukro, diferente eksonerashon di impuesto tabata aplikabel, prinsipalmente pa loke ta trata impuesto riba ganashi. Esaki ta lógiko, pasó enfoke di un fundashon no ta pa hasi ganashi. Awendia kosnan ta otro. Un fundashon ta un persona hurídiko ku por uza tambe den kuadro di aktividat empresarial. Den tal kaso sí e fundashon debidamente ta paga impuesto, tambe impuesto riba ganashi.

Pa krea mas klaridat ki ora un fundashon ta traha solamente den kuadro di un bon kousa, e legisladó hulandes a krea e status di Anbi. Si un organisashon, den kualke forma hurídiko ku ta, ta kumpli ku sierto eksigensia, e organisashon akí lo por haña e status di Anbi e ora ei. Esaki ta hopi atraktivo. Un organisashon rekonosé komo Anbi no solamente no mester paga impuesto riba ganashi pero por risibí donashon i herensia liber di impuesto tambe i alabes e por hasi donashon liber di impuesto tambe. Un Anbi por tuma personal den servisio i den esaki, bou di sierto kondishonnan e por keda eksonerá di pagamentu di e gastunan normal ku ta kai pa doño di trabou. Kòrtiku bisá, kada organisashon lo ke ta un Anbi. Pero kiko ta e eksigensianan? Entre otro lo siguiente.

Na promé lugá, e Anbi mester hasi aseptabel ku no tin un fin di lukro i ku minimalmente 90% di su trabounan enberdat ta na interes general. Na di dos lugá, e atministradó- i supervisornan por gosa solamente di un kompensashon limitá. Na di tres lugá, mester tin un plan di manejo aktual i un atministrashon adekuá i mester hasi tur dos públiko (riba un website).

Esaki ta un bon pasada di e legisladó hulandes. Di pursori, dor di ofresé un perspektiva di bentahanan fiskal konsiderabel, kada organisashon ku ta sinti su mes atraé na e bentahanan akí, ta hañ'é fòrsá di strukturá su governance adekuadamente pa motibu di e kondishonnan mará na esaki. Un Anbi mester tin su asuntunan di finansa na òrdu, mester responsabilisá su mes públikamente tokante uzo di sèn, disponé di un bon struktura di atministrashon, etc. Kalidat di organisashon i atministrashon di e entidatnan akí lo mehorá konsiderablemente dje manera akí. I esaki ta bon tambe pa realisashon di e bunita metanan ku nan ta trata na logra.

Tin un bentaha mas. Hopi organisashon pa bienestar general ta risibí supsidio- i kontribushonnan di gobièrnu. Esaki ta sèn di impuesto ku abo i ami ta sòru p'e. Dor di e eksigensianan ku optenementu di e status di Anbi ta trese kuné, e chèns ta hopi mas grandi ku lo uza e supsidionan ei na e manera korekto. Finalmente tur hende ta bai dilanti dor di esaki.

Pa mi un último aspekto interesante di Anbi ta e manera positivo ku ta imponé good governance. Bon mirá estado ta hasi un 'offer you cannot refuse'. Esaki ta muchu mas útil ku traha lei i purba imponé esakinan pa medio di sanshonnan. Aki tambe nos lo por hasié ku nos fundashonnan ligá na gobièrnu: laga e regulashon di bentaha- i desbentahanan fiskal dependé di un bon governance interno. Di e manera akí, e governance di fundashonnan privá den bienestar i kuido tambe lo haña un mehorashon importante. Dor di limitá e dedusibilidat di donashonnan serka e donante si nan no hasi donashon na un Anbi, ta fòrsa e institushonnan reseptor pa drecha nan governance. Ku otro palabra laga nos introdusí Canbi, Banbi, Xanbi i Anbi den Karibe Hulandes.

---